



REPUBLIKA E SHQIPËRISË

MINISTRIA E PUNËVE TË BRENDSHME

KOMISIONERI PËR TË DREJTËN  
E INFORMIMIT DHE MBROJTJEN  
E TË DHËNAVE PERSONALE  
KOMISIONERI

MINISTRI

Nr. 5242/9. Prot  
Tiranë, më 27. 02. 2026

Nr. 6131. Prot  
Tiranë, më 27. 2. 2026

UDHËZIM I PËRBASHKËT

Nr. Prot 36 PËR Dt. 27.02.2026

“PËRCAKTIMIN E RREGULLAVE, TRAJTIMIT, ADMINISTRIMIT DHE  
SHPËRNDARJES SË TË DHËNAVE PERSONALE TË MBLEDHURA NGA  
POLICIA”

Në mbështetje të nenit 102, pika 4, të Kushtetutës së Republikës së Shqipërisë, të nenit 38, pika 2, të ligjit nr. 82/2024 “Për Policinë e Shtetit” dhe ligjit nr. 124/2024 “Për mbrojtjen e të dhënave personale”, Ministri i Punëve të Brendshme dhe Komisioneri për të Drejtën e Informimit dhe Mbrojtjen e të Dhënave Personale,

UDHËZOJNË:

Neni 1

Objekti

Ky udhëzim ka për objekt përcaktimin e rregullave dhe procedurave për trajtimin, administrimin dhe shpërndarjen e të dhënave që përpunohen nga strukturat e Policisë së Shtetit, për qëllime policore.

Neni 2

Fushëveprimi

1. Rregullat e këtij udhëzimi aplikohen për proceset e përpunimit të të dhënave personale të kryera në mënyrë manuale dhe përmes sistemeve elektronike të Policisë së Shtetit, për kryerjen e procedurave policore.
2. Strukturat e Policisë së Shtetit do të zbatojnë parashikimet e këtij udhëzimi vetëm për sa i përket të dhënave personale që përpunohen për qëllime policore.
3. Të dhënat e tjera personale, që përpunohen rreth stafit ose për qëllime që nuk lidhen drejtpërdrejt me ato të përcaktuara në pikën 1, të këtij neni, zbatohen në përputhje me parashikimet e Pjesës I dhe II të Ligjit nr. 124/2024 “Për mbrojtjen e të dhënave personale”, (në vijim ligji nr. 124/2024).

### **Neni 3** **Përkufizime**

1. Në këtë udhëzim, termat e mëposhtëm kanë këto kuptime:
  - a) “*Anonimizim*”, është procesi i përpunimit të të dhënave personale duke përdorur një grup teknikash që e bëjnë të pamundur identifikimin e një personi me çfardo mjeti. Të dhëna do të konsiderohen të anonimizuara në mënyrë efektive nëse subjektet e të dhënave personale, nuk bëhen më të identifikueshëm.
  - b) “*E dhënë personale*” është çdo informacion në lidhje me një subjekt të dhënash.
  - c) “*Përpunim*” është çdo veprim ose një grup veprimesh, që kryhet mbi të dhënat personale ose grupe të dhënash personale, pavarësisht nëse kryhen me mjete të automatizuara ose jo, të tilla, si: mbledhja, regjistrimi, organizimi, strukturimi, ruajtja, përshtatja ose ndryshimi, rikthimi, konsultimi, përdorimi, përhapja me anë të transmetimit, shpërndarjes ose vënies në dispozicion në ndonjë mënyrë tjetër, lidhja ose kombinimi, kufizimi, fshirja ose shkatërrimi;
  - ç) “*Kontrollues*” është personi fizik ose juridik dhe çdo autoritet publik, i cili, vetëm ose sëbashku me të tjerët, përcakton qëllimet e mjetet e përpunimit të të dhënave personale.
  - d) “*Komisionerin për të Drejtën e Informimit dhe Mbrojtjen e të dhënave Personale*” është autoriteti mbikëqyrës i pavarur dhe përgjegjës për monitorimin e mbikëqyrjen e zbatimit të Ligjit, me qëllim mbrojtjen e të drejtave dhe lirive themelore të individëve në lidhje me përpunimin e të dhënave personale.
  - dh) “*Subjekt i të dhënave*” është çdo person fizik i identifikuar ose i identifikueshëm.
  - e) “*Fshirja e të dhënave*” është procesi i heqjes ose zhdukjes së të dhënave personale të ruajtura në sistemet/regjistrat e Policisë së Shtetit sipas legjislacionit për mbrojtjen e të dhënave personale.
2. Terma të tjerë të përdorur në këtë udhëzim kanë të njëjtin kuptim me ato të nenit 3, të Ligjit nr. 82/2024 “Për Policinë e Shteti” (në vijim ligji nr. 82/2024) dhe nenit 5, të ligjit nr.124/2024.

### **Neni 4** **Parimet e përpunimit**

Përpunimi i të dhënave personale nga Policia e Shtetit kryhet në përputhje me parimet e përcaktuara në Ligjin nr. 124/2024, duke garantuar respektimin e të drejtave të individit dhe qëllimin e ligjshëm të veprimitarisë policore.

### **Neni 5** **Kategoritë e të dhënave personale të përpunuara gjatë veprimitarisë policore**

Gjatë veprimitarisë policore, strukturat e Policisë së Shtetit përpunojnë të dhënat e përcaktuara në nenin 36, të ligjit nr. 82/2024, si dhe të dhëna personale të tjera të lidhura drejtpërdrejtë me ushtrimin e veprimitarisë, të kategorizuara si më poshtë:

1. Të dhëna identifikuese të cilat përfshijnë:
  - emër
  - mbiemër
  - datëlindje
  - NID

- gjinia
- 2. Të dhëna kontakti të cilat përfshijnë:
  - adresa
  - e-mail
  - nr. tel./cel ose rrjete sociale
- 3. Të dhëna profesionale të cilat përfshijnë:
  - CV
  - arsimi
  - punësimi
- 4. Imazhe të cilat përfshijnë foto dhe video.
- 5. Të dhëna sensitive të cilat përfshijnë:
  - shëndetësore
  - biometrike,
  - penale,
  - origjinë racore, etnike, bindje politike, besim fetar, orientim seksual, anëtarësim në sindikatë.
- 6. Të dhëna financiare dhe pronat të cilat përfshijnë:
  - nr. llogarie bankare
  - prona të paluajtshme/luajtshme, në pronësi/ përdorim
  - aktivitete ekonomike brenda dhe jashtë vendit
- 7. Hyrje-daljet nga territori shqiptar që përfshijnë:
  - datë, orë
  - profil i krijuar
  - dokument udhëtimi,
  - të dhëna identifikuese me foto
  - të dhëna të automjeteve
- 8. Të dhëna mbi lidhjet miqësore/shoqërore me interes.
- 9. Të dhëna me interes për ambientet që frekuentohen që mund të përfshihen , por pa u kufizuar në bare, lokale, hotele, objekte kulturi etj.

## **Neni 6**

### **Të drejtat e subjekteve të të dhënave**

Subjektet, të dhënat e të cilëve përpunohen nga Policia e Shtetit, gëzojnë të drejtat për informim, akses, korrigjim, fshirje ose kufizim të përpunimit, si dhe të drejtën për rishikimin e përgjigjes, sipas Ligjit nr. 124/2024, me kufizime të lejuara vetëm në raste të përcaktuara qartë nga ky ligj.

## **Neni 7**

### **Regjistrimi dhe detyrimi për të dokumentuar**

1. Çdo veprim përpunimi i të dhënave personale, duhet të regjistrohet në një mënyrë të përshtatshme duke garantuar se ligjshmëria e përpunimit mund të monitorohet dhe verifikohet, sipas kriterëve të parashikuara në nenin 62, të Ligjit nr.124/2024.
2. Të dhënat e regjistrimit, duhet të bëjnë të mundur përcaktimin e arsyes, të datës e të kohës së këtyre veprimeve dhe, për aq sa është e mundur, identifikimin e personit që ka konsultuar ose përhapur të dhënat personale, si dhe identitetin e çdo marrësi të këtyre të dhënave personale.
3. Strukturat e Policisë së Shtetit duhet të administrojnë dokumentacionin përkatës që përmban të dhëna personale, me qëllim dokumentimin e veprimtarive të përpunimit, në përputhje me nenin 61, të ligjit nr. 124/2024.

4. Policia e Shtetit për regjistrimin dhe dokumentimin e të dhënave personale përdor sisteme elektronike dhe dokumente apo regjistra zyrtarë.

## **Neni 8**

### **Masat e sigurisë**

1. Në çdo rast, strukturat përkatëse të Policisë së Shtetit përdorin sisteme të sigurta elektronike për regjistrimin dhe ruajtjen e të dhënave.
2. Sistemet garantojnë auditimin dhe gjurmueshmërinë lidhur me veprimet e kryera ndaj të dhënave personale të përpunuara, sipas nenit 62, të Ligjit nr.124/2024.
3. Strukturat e Policisë së Shtetit komunikojnë nëpërmjet ndërveprimit të sistemeve shtetërore të certifikuara, me protokolle të dokumentuara në zbatim të qëllimit të veprimtarisë së tyre.
4. Policia e Shtetit merr masat organizative për caktimin e personave të autorizuar që kanë të drejtë të aksesojnë të dhënat, trajnimin e punonjësve për mbrojtjen e të dhënave dhe ruajtjen e konfidencialitetit, si dhe masat e sigurisë fizike lidhur me ambientin.

## **Neni 9**

### **Mekanizmat konfidencialë të raportimit**

1. Policia e Shtetit krijon dhe përdor mekanizma apo kanale të sigurta dhe konfidenciale, që garantojnë raportimin e shkeljeve të ligjit për mbrojtjen e të dhënave personale.
2. Mekanizmat e raportimit të përdorura nga Policia e Shtetit janë:
  - a) *e-mail* i dedikuar me qasje të kufizuar;
  - b) platformë online për përdorim të brendshëm, sipas aksesit të autorizuar;
  - c) pajisje fizike të dedikuara të raportimit, të vendosura në ambientet e institucionit;
  - ç) raportim verbal me mbajtje protokollit në zyrë të caktuar;
  - d) çdo formë tjetër raportimi që përmbush kërkesat e ligjit;
3. Në çdo rast të raportimit, Policia e Shtetit duhet të garantojë konfidencialitetin e identitetit të raportuesit dhe personave të përfshirë.

## **Neni 10**

### **Konfidencialiteti i të dhënave**

1. Të gjitha strukturat policore, personat dhe punonjësit që zbatojnë këtë udhëzim, detyrohen të ruajnë konfidencialitetin e të dhënave të përpunuara gjatë ushtrimit të funksioneve të tyre, edhe pas përfundimit të funksionit.

## **Neni 11**

### **Transferimi ndërkombëtar i të dhënave personale**

Transferimet e të dhënave personale nga ana e Policisë së Shtetit kryhen vetëm në zbatim legjislativ në fuqi për mbrojtjen e të dhënave personale.

## Neni 12

### Bashkëpunimi me Komisionerin

1. Komisioneri për të Drejtën e Informimit dhe Mbrojtjen e të Dhënave Personale monitoron respektimin e rregullave të përcaktuara në këtë udhëzim të përbashkët.
2. Çdo shkelje e dispozitave të këtij udhëzimi duhet të raportohet dhe të trajtohet në përputhje me dispozitat e Ligjit nr.124/2024.

## Neni 13

### Dispozita Përfundimtare

Ngarkohet Drejtoria e Përgjithshme e Policisë së Shteti dhe strukturat e saj për zbatimin e këtij udhëzimi.


## Neni 14

### Hyrja në fuqi

Ky udhëzim hyn në fuqi menjëherë pas publikimit të tij në Fletoren Zyrtare.

PËR  
MINISTRINË E PUNËVE TË BRENDSHME  
MINISTRI

ALBANA KOÇI



PËR  
KOMISIONERIN PËR TË DREJTËN  
INFORMIMIT DHE MBROJTEN  
E TË DHËNAVE PERSONALE

KOMISIONERI

BESNIK DERVISHI

